

# Nova partenza per il campadi Rein

Il campadi a Rueras sto parzialmein vegnir disloccaus – L'auter onn cun ina nova gestiunaria

DAD ANDREAS CADONAU/FMR

■ Il campadi Rein a Rueras rescheiva a partir da l'auter onn ina nova gestiunaria ed ina midada da zona duess dar plaz al campadi per sesviluppar ordeifer la zona da prighel.

Camp Impuls senumna l'interpresa ch'indichescha da s'engaschar per innovativas e durablas experienzas da campar. Cun bia savida ed entusiassem cussegli campimpuls, tenor atgnas indicaziuns, menaders da piazzas da campar en Svizra. Davos quella instituziun da cussegliar stat denter auter *Nicole Ruegsegger* e pertuccont il campadi Rein a Rueras survarga siu engaschi buns cussegls en caussa campar. Ruegsegger ha concediu da sorprendere a partir digl onn proxim il menaschi a Rueras. «Jeu selegrel fetg sin quella incumbensa». Ella enonuscha la Val Tujetsch da visetas sporadicas ed il campadi a Rueras valetescha ella per in liug ideal da realisar sia visium da campar ella natira. Durabladad vesa Nicole Ruegsegger buca sulet per etichetta, sco ella ha puntuau. «Il basegns da campar e da far vacanzas datier dalla natira e cun la natira crescha». Nicole Ruegsegger ha denter auter absolvii ina scolaziun da dunna dil fatg turistic. Ella ha regurdau al diember carschent da pernottaziuns da campar dils davos onns en Svizra, succediu era senza corona e sias restricziuns. In motiv da s'engaschar en quella sparta turistica per la dunna dil fatg, Nicole Ruegsegger remplazza *Christina Schmid* che ha tgamunau la piazza da campar a Rueras ils dus onns vargai.

## Negina opziun

Christina Schmid ha tradiu ch'ella havess bugen continuau cun siu engaschi per la piazza da campar Rein. Las soluziuns



La piazza da campar a Rueras drova niev spazi demai ch'ina part dil plaz sesanfla ella zona da prighel.

FOTO SUSI ROTHMUND

purschidas dil cussegl d'administraziun e dils novs gestiunaris per continuar sut novas cundiziuns han denton buca perschuadiu. Principalmein la proposta da surdar la gestiun dalla piazza da campar en novs mauns e seconcentrar sulet sil menaschi d'ustria ei tenor Christina Schmid pauc realistica. «Sulet il menaschi d'ustria dalla piazza da campar porscha negina existenza». Da restar el menaschi sco emploiada dalla nova gestiunari ha Schmid buca vuliu. Aschia ch'ella ei sedecidida da terminar sin la fin digl onn cun siu engaschi en favur. «Da mia

vart eis ei impurtont ch'ils indigens sandaco che jeu calel.» Nicole Ruegsegger attribuescha alla gestiunaria actuala in grond engaschi. Grazia ad ella hagi il campadi Rueras anflau dabia accoglientscha da populaziun e da hospis. S'integrar en ina nova gestiun seigi pli probabel stau negina opziun suenter dus onns da menaschi en atgna reschia. «Quei capeschel jeu bein», aschia Ruegsegger.

## Parzialmein en zona da prighel

La midada da gestiun ei denton buca la suletta nova pertuccont il plaz da campar

a Rueras. Ina piazza da camping ch'ei purtada dad ina societad d'acziun. Las acziun ein derasadas per gronda part enteifer la populaziun tuatschina che ha aschia sustenu la purschida turistica a Rueras. Il cussegl d'administraziun ei s'engaschaus per gronda part a moda voluntaria per quei menaschi. La plipart da quei cussegl d'administraziun ei denton seretratgs a caschun dalla davosa radunonza dil acziunaris la primavera vargada. Nicole Ruegsegger ha dau d'entellir ch'il cussegl d'administraziun seigi sin buna via da s'organisar da niev. Ed ella ha dau d'entellir che

la piazza da campar basegni da novas investiziuns. Investiziuns che duessan vegnir ton dalla societad acziunaria sco da campimpuls. En scadin cass sesanfla ina part dil plaz existent a Rueras ella zona da prighel. In fatg ch'il president communal, *Martin Cavegn*, ha confirmau. El ha getg ch'ina midada dalla zona seigi sin rucca per dislocar ina part dalla piazza. E menziunau la prontad dil possessur da terren ella vischinonza da metter a disposiziun il terren per dislocar ed engrondir la piazza da campar. «La midada dalla zona da quei terren agricol ei sin buna via».

# Legras paterladas el Bellevue

DAD AUGUSTIN BEELI/FMR

■ Schi bia romontsch han ins gia dapi onns buca udiu a tschintschar en quella casa. A Flem ha la Cuminonza romontscha beneventau el hotel Bellevue in bi triep d'interessents agl emprem Café rumantsch. «Igl emprem Café rumantsch a Flem ei gartegiaus oreifer.

La moderatura *Claudia Margison-Casanova* mereta in grond laud. «Il fatg che differentas fatschas giuvnas han priu part muossa che quella fuorma savess davenar cun success», resumescha *Giosch Gartmann*. Il suprastont dalla Cuminon-

za romontscha da Flem ha tschaffen dalla sera emperneivla el hotel Bellevue. Malgrad respect dil coronavirus ha giuven e vegl mussau interess.

Il president dalla CRF, Hanspeter Meiler, ha saviu beneventar *Andreas Gabriel* ed *Alice Bertogg* dalla Lia Rumantscha. La collaboratura regiunala ha presentau il concept dils Cafés rumantschs che la LR ha lantschau egl entir Grischun. Ina dallas finamiras eis ei da scafir ina reit da contacts che duei empunir la populaziun romontscha da Flem e vitalisar la schientscha pil quart lungatg nazional.

Ell'emprema alzada dil Bellevue historic baghegius 1577 da Riget de Capol han ils hoteliers *Marianne Tobler* e *Ruud Willemssen* mess a disposiziun duas stanzas. Ei ha duvrau duas, pertgei la moderatura e menadra dil Café rumantsch aveva preparau in «Speed dating» pils presents. Mintgamai duas persunas han empriu d'enonuscher in l'auter cun far damondas vicendeivlas. Siat minutas ha ina runda pintga cuzzau, lu ha ei dau ina midada da partenaris. Suenter ina runda el ravugl pign han tuts astgau rapportar el plenum dils discuors e dialogs. Ils organisators han sedau tutta breigia da risguardar

las mesiras da corona. Distanzas dallas meisas e sutgas, mascras, mied da desinfectar, registraziun dils presents cun fegliet: tut ei stau semtgau conform al concept obligat. La tematica da quell'emprema sera dil Café rumantsch ha gidau da sluccar e da sesentir da casa. Ils presents han guidu il giug «Tgi eis Ti?». El plenum moderaus da *Claudia Margison* han tuts astgau rapportar e vegnir a plaid. Ei seigi stau ina sera legra e hilarica, ha il participont *Giosch Gartmann* manegia, l'atmosfera seigi stada libra ed aviarta, ils presents hagian saviu tedlar, raquintar e cunzun rir da cor. Denter ils presents a

quell'emprema sentupada dil Café rumantsch a Flem han ins viu buca mo habitonts da Flem ch'ei era carschi si leu. «Era tals che han giu biars contacts a Flem, ni ch'ei setratgs neutier suenter la pensiun, ein vegni el hotel Bellevue, forsa per meraviglias, ni pil divertiment personal. Ferton ch'is seniors han mirau plitost anavos sin lur hobis, ha la generaziun giuvna, vul gir geniturs d'affons pigns, priu la veta da famiglia ed il contuorn el center e raquintau surlunder. Ina buna mischeida ei sedada, quella ha contribuui ad ina stupenta sera. Pil Café rumantsch a Flem ina entschatta empermettona.



Hanspeter Meiler, il president dalla CRF, la moderatura *Claudia Margison-Casanova* ed *Andreas Gabriel* dalla Lia Rumantscha (da san.)

FOTO GIOSCH GARTMANN



En ina dallas salas dil hotel Bellevue ha ei dau bia da discutir e da rir.

FOTO LIA RUMANTSCHA